

**PEMBERITAHUAN PERTANYAAN BAGI JAWAB LISAN**  
**DEWAN RAKYAT MALAYSIA**

**PERTANYAAN : JAWAB LISAN**

**DARIPADA : DATO' SRI HASAN BIN MALEK**  
**[ KUALA PILAH ]**

**TARIKH : 3 APRIL 2017**

**SOALAN : Dato' Sri Hasan Bin Malek [ Kuala Pilah ]**  
minta **MENTERI LUAR NEGERI**  
menyatakan iaitu walaupun Malaysia tidak  
lagi menduduki kerusi Ahli Tidak Tetap  
Majlis Keselamatan PBB, apakah peranan  
yang boleh dimainkan oleh Malaysia untuk  
memastikan Israel mematuhi Resolusi 2334  
ke arah menghentikan sebarang aktiviti  
penempatan haram di Palestin dan  
Jerusalem.

## **JAWAPAN**

Tuan Yang di-Pertua,

Saya ingin mengucapkan terima kasih kepada Yang Berhormat Kuala Pilah di atas pertanyaan yang dikemukakan.

Tuan Yang di-Pertua,

2. Seperti mana Dewan yang mulia ini sedia maklum, Malaysia sentiasa komited dalam memperjuangkan hak-hak rakyat Palestin untuk menubuhkan sebuah negara yang merdeka dan berdaulat.

3. Resolusi 2334 (2016) yang diluluskan di Majlis Keselamatan PBB mengesahkan bahawa penempatan oleh Israel di wilayah Palestin sejak tahun 1967 adalah haram dan merupakan pelanggaran kepada undang-undang antarabangsa. Resolusi tersebut juga menggesa Israel untuk menghentikan segera dan sepenuhnya semua aktiviti penempatan yang diduduki di wilayah Palestin dan mendesak agar tindak-tanduk Israel dilaporkan oleh Setiausaha Agung PBB kepada Majlis Keselamatan setiap tiga bulan.

4. Walaupun Malaysia tidak lagi menganggotai Majlis Keselamatan PBB, Malaysia akan terus mengambil bahagian dalam debat terbuka berpenggal mengenai situasi di Timur Tengah termasuk Palestin yang diadakan setiap tiga bulan di Majlis Keselamatan PBB dan mesyuarat-mesyuarat yang berkaitan di Perhimpunan Agung PBB bagi menggesa supaya Majlis Keselamatan PBB melaksanakan resolusi tersebut secara menyeluruh dan terang-kum.

5. Malaysia akan menggunakan platform ini untuk mengingatkan dan menggesa Israel supaya mematuhi serta menghormati Resolusi-Resolusi PBB, khususnya Resolusi 2334. Malaysia juga akan terus menyeru agar Majlis Keselamatan memainkan peranan bagi memikul tanggungjawabnya seperti yang termaktub dalam Piagam PBB bagi memastikan Resolusi 2334 dilaksanakan sepenuhnya.

Tuan Yang di-Pertua,

6. Malaysia menyokong penyelesaian yang adil dan menyeluruh dengan penubuhan dua negara, Israel dan Palestin yang wujud secara sebelah menyebelah dengan aman berdasarkan kepada sempadan sebelum tahun 1967, dengan Baitulmaqdis (*East Jerusalem*) sebagai ibu negara Palestin.

7. Malaysia juga sentiasa komited untuk menyuarakan sokongannya terhadap negara Palestin di pelbagai forum antarabangsa selain daripada PBB termasuk Pertubuhan Kerjasama Islam (OIC) dan Persatuan Negara-Negara Asia Tenggara (ASEAN).

8. Usaha terbaru Malaysia adalah semasa Sesi Tergempar Majlis Menteri-Menteri Luar Negeri OIC di Kuala Lumpur Mengenai Situasi Minoriti Islam Rohingya pada 19 Januari 2017. Malaysia bersama-sama negara-negara anggota OIC telah menerima pakai "Deklarasi Kuala Lumpur Mengenai Palestin dan Al-Quds Al-Sharif" sebagai salah satu dokumen hasil Sesi Tergempar tersebut. Kandungan Deklarasi tersebut mengutuk tindakan Israel yang terus merampas hak dan tanah rakyat Palestin. Di samping itu, Malaysia bersama-sama negara-negara

anggota ASEAN juga telah membuat kenyataan yang sama semasa Malaysia menjadi Pengerusi ASEAN pada tahun 2015.

9. Kegiatan perluasan penempatan haram oleh Israel di Tebing Barat dan Jerusalem memperlihatkan pencabulan berterusan Israel ke atas hak-hak rakyat Palestin dan penghinaan terhadap undang-undang antarabangsa. Aktiviti penempatan haram Israel mampu mengancam penyelesaian dua negara konflik ini.

Tuan Yang di-Pertua,

10. Di samping itu, Malaysia juga secara konsisten mendesak Israel untuk menghentikan aktiviti penempatan haram mereka melalui pertubuhan – pertubuhan bukan kerajaan (NGOs) Malaysia. Peranan yang dimainkan oleh NGO-NGO ini adalah penting di mana mereka sentiasa mengetengahkan isu penindasan yang dihadapi oleh rakyat Palestin di media.

11. Pendekatan ini dapat menarik perhatian pertubuhan-pertubuhan antarabangsa seperti *Human Rights Watch*, *Amnesty International*, *United Nations' Office for the Coordination of Humanitarian Affairs (UN-OCHA)* dan banyak lagi, di mana ia mampu memberi tekanan kepada Israel agar menghentikan kekejaman terhadap Palestin dan pembinaan penempatan haram di Tebing Barat.

12. Sebagai contoh, Misi kemanusiaan *Women's Boat to Gaza (WBG)* pada tahun lalu yang disertai oleh NGO Malaysia dianjurkan untuk memecahkan kepungan dan sekatan ke atas Gaza. Misi ini berjaya memberi isyarat kepada Israel bahawa seluruh dunia sedang

memerhatikan dan mengutuk keras kekejaman mereka terhadap rakyat Palestin.

Sekian, terima kasih.